

Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut (Nunap immikkoortuini akitigut naligiissaarisooqarnissaanut aamma ajunaalernerni isumannaallisaanikkullu sullissiffiusut annertusineqarnissaanut akuersissummik pigisaqartumut peqqusinissamut tunngavissaq)

(Ineqarnermut Attaveqaasersuutinullu Naalakkersuisoq)

Saqqummiussissut

(Ineqarnermut Attaveqaasersuutinullu Naalakkersuisoq)

Siullermeerneqarnera

Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaata allanngortinneqarnera pillugu Inatsisartut inatsisaattut siunnersuut matumuuna Naalakkersuisut sinnerlugit saqqummiuppara.

Siunnersuut marlunnik immikkoortoqarpoq:

- Sullissinerni akuersissuteqarfiusuni nunap immikkoortuini akitigut naligiissarinissamut Tusassimut peqqusinissamut tunngavissaq
- Ajunaalernerni isumannaallisaanikkullu sullissiffiusut nunami ajunaalernerni isumannaallisaanikkullu sullissinerit ilaatilerlugit annertusineqarneri.

Siunnersuummi siunertaq tassaavoq Aningaasanut inatsimmi 2021-mili oqaasertaliussaasimasup nunami akitigut naligiissarinissamut tunngaviup ingerlateqqinnissaa. Nalunaarasuartaatitigut atassuteqarnermi akuersissut nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaanni malittarisassaliorneqarpoq. Taamaattumik nuna tamakkerlugu akitigut naligiissarinissamut tunngavik Inatsisartut inatsisaanni matumunnga ilaavoq.

Tunngavik peqanngippat imaatigut kabelip, sakkortusaaveqarfiit aamma qaammataasakkut atassuteqarfiusut akornanni akitigut naligiissaarisooqarsinnaangilaq. Tamanna tassaavoq Unammilleqatigiinnermut inatsimmut naleqqiullugu Atuisoqarnermut Unammilleqatigiinnermullu Aqutsisoqarfiup 2020-mi aalajangiinerata kingunerisaa.

Akitigut naligiissarisooqanngippat Nuummi isorliunerusunilu internetimi akit annertunerusumik assigiinngissuteqassapput, isorliunerusullu malunnaatilimmik qaffasinnerusunik akeqarfiussallutik. Nuna tamakkerlugu akitigut annikinnerusumik

assigiinngissuseqartumik - annertunerusumik naligiittumik ineriartortoqarnissaa Naalakkersuisut kissaatigaat.

Siunnersuummi imaatigut ajunaalernerni isumannaallisaanikkullu sullissinerit ilaatinneqanngitsooreersut assigalugit nunami ajunaalernerni isumannaallisaanikkullu sullissinerit Namminersorlutik Oqartussat kisermaassiffiunut ilaatinneqanngillat. Taakku Tusassimiit aatsaat pilersuineruppata nunami ajunaalernerni isumannaallisaanikkullu sullissinerit atorneqarnissaat inatsisinut naapertuuttuussapput. Tamanna isumaqarpoq ilaatigut InReach-ip nunami atorneqarnissaa inatsisinik unioqquitsinerusoq. Atortoq aallaaniarnermi, pisuttuarnerni ilisimasassarsionernili inuunermik annaassisinnaavoq. Taamaattumik taakku atorneqarnerinik inatsisit pisariaqanngitsumik killilersuissanngillat.

Taamatut oqaaseqarlunga siunnersuut Inatsisartut akuersaartumik suliarinissaanut tunniuppara.